

Süleyman Beşe b. Abdullah mahzarında da'vâ ettim iki köhne sarı kaftan ve bir siyah Bursa fotası ve iki kuşak ve bir ferâce mezkûr Süleyman'ın kayın anası Kamer Hâtun'a emânet vaz' eyleyip merkûm Süleyman alıp kabz eyledi hâlâ zikr olunan esbâbları taleb ederim şer'le suâl olunsun dedikde zikr olunan esbâbları kayın anam mezkûre Kamer Hâtun'a emânet vaz' eyledi ben mezbûrenin esbâbını almadım deyu inkâr edip yemîn billâh ettiği kayd-ı sicil olundu.

Tahrîren fî evâili Safer li sene elf.

Şuhûdü'l-hâl: İmirza Bâzârbaşı, Hüseyin b. Behrâm, Şucâ' b. Abdullah, Ömer b. Veli, Mehmed b. Behrâm

1104 [106b-2] Kara Süleyman'ın, Valide Sultan Bîmârhânesi'nde yatan kızı Kerime bt. Kara Süleyman'ı, Mustafa Bey b. Abdullah'ın oğluna nikâhladığı

Dergâh-ı âlî bevvâblarından fahrü'l-eşbâh Mustafa Bey b. Abdullah mahfil-i şer'-i şerîfe hâzır olup takrîr-i merâm ve bast-ı kelâm eylediği bundan akdem vasîyy-i muhtârı olduğum Kerime bt. Kara Süleyman nâm sagîri babası mezbûr Kara Süleyman mahrûse-i Üsküdar'da vâki' merhûm ve magfûrun-leh Vâlide Sultân binâ ettiği bîmârhâne'de hasta yatarken Müslümanlar mahzarında beni vasîyy-i muhtâr nasb edip kızı sagîre Kerime'yi benim sagîr oğlum Mehmed'e Allahü te'âlânın emri ile verdim dedikde ben dahi ol mahalde kabûl ettim deyiş hâzır bi'l-meclis olan Müslümanları işhâd dahi etmiş idim el-hâletü hâzihî mezbûr Kara Süleyman fevt olup sagîre-i mezkûrenin âhar velîsi olmamağın husûs-ı kazıyye bi'l-muvâcehe isbât için vasî lâzım olmağın kibel-i şer'den bir vasî ta'yîn olunmasın taleb ederim demeyin husûs-ı mezbûre husûsiçin kibel-i şer'-i şerîfden fahrü'l-eşrâf Seyyid Maksud b. es-Seyyid Şemseddin vasî nasb olundukdan sonra mezbûr Mustafa Bey vech-i meşrûh üzre mezkûr Seyyid Maksud mahzarında takrîr-i merâm edip merhûm Kara Süleyman bîmârhâne'de yatarken sagîre kızı Kerime'yi benim oğlum sagîr Mehmed'e Müslümanlar mahzarında Allahü te'âlânın emri ile helalliğe verdim dedi ben dahi kabûl ettim dedim dedikde gibbe'l-inkâr ve'l-istişhâd udûl-i müsliminden fahrü's-sâdât Seyyid İbrahim b. es-Seyyid Sinan ve Abdülkerim b. Hasan nâm kimesneler meclis-i şer'de li eclîş-şehâde hâzırân olup fi'l-vâki' mezbûr Kara Süleyman bîmârhâne'de hasta yatarken kızı sagîre Kerime'yi mezbûr Mustafa Bey'in oğlu Mehmed'e Allahü te'âlânın emri ile helalliğe verdim dedi merkûm Mustafa Bey dahi kabûl ettim dedikden sonra bizi ve ol mahalde hâzır olan Müslümanları işhâd eyledi bu husûsa şâhidleriz şehâdet ederiz dediklerinde ba'de't-ta'dîl ve't-tezkiye şehâdetleri hayyiz-i kabûlde vâki' olıcak kayd-ı sicil olundu.